

**■ GLOSSA**

# Offertas last minute

DA SILVIO CAMENISCH

**N**agina tema, nus n'offrin betg mars e muntognas e la vita perpetna, nus essan modests ed offrin, ditg modestamain insaquantas interessantas offertas last minute al suveran da la terma. Fan Hotelplan e Kuoni er, pertge betg nus er? Nus da nossa gruppa d'interess fissan ils davos che cumprassan, insatge betg en urden?, che cumprassan il votant e schon er la votanta cun offertas carmalantas la davosa minuta. Faschain nus betg. Nus betg. Il votant n'è betg tschorv, n'ha betg la tschorvadad da chamutschs, navair betg signur inspectur da chatscha? e s'accorscha uschia insatge.

**D**uessan nus vegnir resguardads, frestgentassan nus tuttas vossas fassadas dador, sin noss quint. Las fassadas dadens (internas) avessan nus etappà, vegnissan er vidlonder cun temp e pazienza, sin noss quint. La via nova tras il cumün in silenzi, insatge sco la via sacra da Val, Val als da Val, survegniss ina tuttafatg veglia nova sula da, renovada daltut en Cr., sin noss quint. Las saivs lung il corso dastgan votants e votantas eleger, lain nus saivs da spizzads, saivs da spinatschs u lain nus insatge auter? Saivs da filfier cun spinas, giain respecti-



vamain stain nus gea en ina guerra burgaisa, e tuts san pertge. Fiss uss manà cun chanals oho surpendents auas sontgas, heilige Wasser, da Val als da Val e schuà lur culturas repetissan nus er anc. Las medias han bain repetì, las medias!

**G**uardain via beamer, tge meglieraziuns d'offerta che nossa gruppa d'interess offra, u fiss grammaticalmain correct offrescha? tge di il Signur da las grammaticas?, la davosa minuta, avant che l'urna serra. Insacur serra ella, ha'la er fin si qua, e tgi ch'è vegnì memia tard stat dador, sco tar tuttas. Nus offrin last minute, survegn la clientel er betg dapertut, in project amegliera in extremis. Noss beamer Testieger ha mussà si, realisassan nus als da Val, Val als da Val, dasper la terma ina baselgia da la pasch, sin noss quint.

**N**us da nossa gruppa d'interess investissan en in stadion olimpic gigantic. Per Val als da Val. Er investissan nus en segundas, terzas e quartas ed uschia vinavant abitaziuns cun letgs fraids, cun la forza da las auas da Val stgaurdassan nus schon en quels. Vom Wasser haben wir's gelernt, vom Wasser. En cass da dumondas, dubis perfin nauscha conscienza last minute veglian ins a volver tar noss expert en chaussa: nov cuss. naz. Candinas. El sa svolva schon giu Berna per nossa chaussa, per chaussa nossa. Grazia.

**Q**ua, noss bloc gigantic innovativ (format A2) per cruschar giavischs extra last minute sco tar il pizzaiolo, survegn il suveran er betg dapertut. Nova chasa e curtin, pertgira ti ella, bab divin! Tes reginavel. Nova cuschina. Nova vischina. Nov carner. Nov giagliner. Nova stizun da cudeschs, cun pretschs fixs. Novs cudeschs d'aduraziun en la baselgia da la pasch futura, sin noss quint. Sin Voss quint, signur stararchitect? Sin noss quint. Prendais Vus il project, prendain nus il premi d'architect.

**S**o, liebe Maria Walisser, Nun musst du dich entscheiden, wer dein Herzblatt sein soll!